

## Naša stranka: Presuda Karadžiću prilika za odmak od svih zločinačkih ideologija



Povodom izricanja pravomoćne presude Radovanu Karadžiću Naša stranka pozdravlja odluku kojom je Međunarodni rezidualni mehanizam za krivične sudove potvrdio odgovornost ratnog političkog lidera Republike Srpske za genocid i zločine protiv čovječnosti i izmijenio kaznu kojom je prvobitno bio osuđen na 40 godina na doživotnu kaznu zatvora.



(Foto: Klix.ba)

Naša stranka smatra da je punomoćna presuda Radovanu Karadžiću konačna i nepobitna potvrda zločinačke prirode njegovog političkog projekta. Presuda je nedovoljna, ali važna satisfakcija žrtvama. Poput drugih presuda ratnim zločincima koji imaju svoja imena i prezimena i ova presuda je potvrda Karadžićeve lične odgovornosti koja ne smije biti vječni teret cijelom jednom narodu.

Kao i prilikom izricanja prvostepene presude ovom zločincu, Naša stranka poziva sve one koji znaju istinu o počinjenim zločinima da smognu građanske hrabrosti i pomognu nadležnim organima u otkrivanju nepoznatih grobnica žrtava i utvrđivanju činjenica o zločinima. Kažnjavanje zločinaca, utvrđivanje istine o zločinima i dosljedno i iskreno ukazivanje poštovanja prema svim žrtvama je temelj za izgradnju povjerenja među građanima i narodima i zajednički život u multietničkoj državi kakva je Bosna i Hercegovina.

Predsjednik Naše stranke Predrag Kojović je izjavio:

“Presuda, kakva god bila, ne može vratiti mrtve i utješiti one koji su preživjeli Karadžića i njegove istomišljenike. Doživotna kazna pruža veću satisfakciju od kazne izrečene prvostepenom presudom, koja je iznosila 40 godina, ali i dalje je nemoguće zamisliti kaznu koja bi bila adekvatna. Ipak presuda, a posebno sudski materijal na osnovu kojeg je donesena, je dragocjena za BiH i za region jer svima koji negiraju, koji ne znaju ili ne žele da saznaju istinu nudi činjenice na osnovu kojih, ako to žele i imaju građanske hrabrosti, sami mogu uvidjeti fašističku prirodu Karadžićeve ideologije. Prava, istinska i konačna pobjeda nad Karadžićem i njegovim nekadašnjim i sadašnjim sljedbenicima bi bila moderna, evropska Bosna i Hercegovina, država u kojoj su svi njeni građani, bez obzira na svoju etničku i vjersku pripadnost, ravnopravni i slobodni na svakom pedlju naše zemlje. To ne bi bila samo konačna i najteža presuda Karadžiću i Mladiću i sličnima, nego i krucijalna pobjeda Bosne i Hercegovine i svih njenih građana”. (ns, tl)

[\\_Share on Facebook](#)

-  
[\\_Tweet](#)

-  
-

[Follow us](#)

-  
[\\_Share](#)

-  
[\\_Share](#)

-  
[\\_Share](#)

-  
[\\_Share](#)

-  
[\\_Share](#)

Date: 20-03-2019